



**Komunikadu Imprensa**  
**31 Jullu 2023**

## **Loron Internasionál ba Luta Hasoru Tráfiku Umanu: JSMP husu ba parte hotu-hotu atu hamutuk hodi prevene no kombate tráfiku umanu**

Loron 30 Jullu nu'udar loron internasionál kontra tráfiku umanu no tema ba Loron internasionál ba luta hasoru tráfiku umanu iha tinan ida ne'e mak "Tau-matan ba vítima hotu-hotu tráfiku umanu, labele husik ida iha kotuk". Tema ne'e, atu apela ba ema hotu atu halo asaun liután hodi responde ba problema tráfiku nia hun, identifika no apoiu kualkér vítima sira tráfiku nian, inklui haforsa iha prevensaun nune'e krime tráfiku umanu bele menus no ikus lakon husi ita nia leet.

"Relasiona ho loron internasionál luta hasoru tráfiku umanu, JSMP kontinua husu ba iha parte hotu-hotu atu hamutuk halo asaun liután hodi prevene no kombate tráfiku umanu. Tanba krime tráfiku umanu nu'udar krime transnasionál ne'ebé organizadu no envolve ema sira ne'ebé iha podér no kapasidade finanseiru ho alvu ba krime ne'e mak ema sira ne'ebé laiha kapasidade finanseiru, menus informasaun, no ema sira ne'ebé iha situasaun vulnerável," dehan Diretora Ezekutiva JSMP, Sra. Ana Paula Marçal.

JSMP apresia ba esforsu Estadu Timor Leste nian hodi luta hasoru tráfiku umanu, liuhusi aprovasaun Lei Nú. 3/2017, Lei ba Prevensaun no Luta Hasoru Tráfiku umanu no Alterasaun Dahaat ba Kodigu Penál. Alende ne'e, iha tinan 2021, bazeia ba artigu 30 husi Lei Nú. 3/2017 ne'ebé rekere Governu tenke harii Komisaun ida ne'ebé ho responsabilidade atu koordena, promove no asegura serbisu hamutuk ho entidade sira tantu iha rai laran no rai liur ba prevensaun no luta kontra tráfiku umanu, nune'e Governu aprova Dekretu Lei Nú. 9/2021 kona-ba Komisaun ba Luta Kontra Tráfiku umanu ho nia funsaun sira hanesan mensiona iha leten.

Timor Leste, iha ona kazu lubuk kona-ba tráfiku umanu ne'ebé lori ona ba prosesu justisa maibé iha mós kazu balun la konsege lori ba prosesu justisa tanba falta koñesimentu husi comunidade no autoridade sira. Ida ne'e akontese tanba, comunidade no autoridade

balun konsidera situasaun balun husi tipu tráfikú umanu la'os krime, exemplu sai atan ba serbisu doméstika, kaben forsada, serbisu forsadu ka eskravidaun liuliu iha área sira ne'ebé konsidera iha potencialidade ba risku hanesan iha fronteira no área remota sira. Tanba ne'e prezisa hasa'e koñesimentu ba iha comunidade sira inklui investe mós (finanseiru, facilidade no formasaun) ba entidade sira iha liña primeiru hanesan Alfandega, PNTL, UPF, PSIK, Ministériu Justisa, no mós KLATU rasik hodi luta ba prevene tráfikú umanu.

Tuir dadus JSMP nian, husi tinan 2012 to'o iha 2022, JSMP rejista kazu tráfikú umanu hamutuk 7 ho tipu oin-oin. Informasaun kompletu bele haree iha tabela :

Tinan	Tipu kazu	Totál kazu	Estutu kazu
2012	Krime trafiku ho ema	1	Absolve
2015	Krime tráfikú ho ema no violasaun seksuál	1	Kondena ho pena prizaun tinan 16 no selu indemnizasaun sivil US\$1,000.00
2016	Krime trafiku ho ema	1	Pena prizaun tinan 7
2018	Krime tráfikú ho ema, tráfikú ho ema ho agravasaun no falsifikasaun ba dokumentu ka notasaun téknika	1	Pena prizaun tinan 15
2020	Krime explorasaun seksuál ba ema seluk	1	Pena prizaun tinan 3 suspende ba tinan 3
2021	Krime explorasaun seksuál ba ema seluk	1	Arguidu ida bsolve no arguidu ida seluk hetan pena prizaun tinan 2 no suspende ba tinan 4
2022	Krime explorasaun seksuál, ofensa ba integridade fízika simples ho natureza violénsia doméstika	1	Absolve explorasaun seksuál no kondena arguidu ba krime ofensa ba integridade fízika simples (VD) ho pena prizaun fulan 6 suspende ba tinan 2
<b>Totál</b>		<b>7</b>	

Hanesan mensiona iha leten katak kazu tráfikú umanu barak mak la konsege lori ba prosesa iha tribunál, tanba ne'e JSMP husu nafatin ba Governu no parseiru sira atu continua socializa ka fahe informasaun ba iha comunidade sira liuliu iha área rurál kona-ba krime tráfikú umanu no nia tipu sira. Agora dadaun JSMP hetan apoiu husi Governu no UN Women liuhusi programa konstrui kapasidade comunidade sira nian iha suku sira balun iha fronteira no suku balun iha Dili atu haforsa prevensaun no resposta ba tráfikú umanu.

JSMP espera katak liuhusi programa ne'e, comunidade sira bele iha koñesimentu natoon kona-ba saida mak krime tráfik u manu ho nia tipu sira, oinsa halo prevensaun no relata krime sira ne'e.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)

Rua Beco Lakateu, Aldeia Manu fuik, Suku Kolmera, Administrativu Vera Cruz  
Munisípiu Dili, Timor-Leste  
P.O Box ; 275 . Tlp 3323883

Website: [www.jsmp.tl](http://www.jsmp.tl) no facebook: [www.facebook.com/jsmp.timorleste](https://www.facebook.com/jsmp.timorleste)